

16/09/2003

Message from the Prime Minister

ASSALAMUALAIKUM Warahmatullahi Wabarakatuh dan Salam Sejahtera,

Saya mengucapkan selamat menyambut hari ulangtahun Angkatan Tentera Malaysia (ATM) yang ke 70. Sempena sambutan ini, marilah kita bersama-sama memanjatkan kesyukuran kita ke hadrat Allah s.w.t. di hari yang bersejarah ini. Kerajaan amat berterima kasih di atas segala khidmat dan pengorbanan oleh semua anggota ATM dalam menjalankan tugas mereka dengan cekap dan profesional. Mereka telah mempertahankan kedaulatan negara semasa Peperangan Dunia Kedua, darurat, konfrantasi dan ancaman-ancaman pengganas di dalam dan luar negara. Kerajaan sungguh menghargai jasa dan sumbangan besar anggota-anggota ATM terutama mereka yang terkorban semasa berjuang. Kita berdoa semoga roh-roh mereka yang telah gugur diletakkan di dalam golongan orang yang beriman dan dirahmati oleh Allah s.w.t.

Kerajaan dan rakyat Malaysia amat berterima kasih kepada ATM yang telah banyak menabur bakti dalam memelihara keselamatan negara. ATM yang bertanggungjawab menentukan kestabilan dan keamanan negara telah memberi sumbangan yang besar sehingga Kerajaan dapat memberi tumpuan kepada pembangunan negara dan kesejahteraan rakyat di negara ini. Keadaan seumpama ini sukar terdapat di negara-negara membangun yang lain. Malah kebanyakan negara ini tidak aman dan kadang-kadang dilanda peperangan sivil. Akibatnya negara-negara tersebut tidak dapat dibangunkan dan rakyatnya terus mundur dan derita.

Kerajaan kita sentiasa peka terhadap pembangunan ATM. Kerajaan memberi peruntukan bajet pertahanan yang besar untuk memperlengkapkan ATM dengan peralatan moden seperti kereta kebal, kapal perang, peluru roket dan pesawat tempur yang canggih. Daripada segi pengurusan sumber manusia, Kerajaan akan terus meningkatkan kecekapan anggota-anggota ATM dalam mengendalikan peralatan-peralatan moden yang berteknologi tinggi. Latihan-latihan di dalam dan luar negara akan terus diberikan kepada para anggota tentera Malaysia bagi mempertingkatkan tahap kecerdasan mental, ketahanan fizikal dan ilmu pengetahuan agar mereka lebih profesional dan canggih.

Di peringkat antarabangsa, ATM telah mengharumkan nama negara melalui penyertaan dalam pasukan pengaman bagi memelihara keamanan sejagat. Bermula dari Congo pada tahun 1960 sehinggalah ke Timor Leste pada tahun 2000, ATM terus memainkan peranan cemerlang membantu Pertubuhan Bangsa-Bangsa Bersatu (PBB) memulihkan dan membangunkan semula negara-negara yang menghadapi kancas peperangan di seluruh dunia. Negara juga telah menerima penghormatan yang tinggi daripada PBB di atas pengorbanan warga ATM.

Akhir sekali, Kerajaan menyeru semua anggota ATM supaya sentiasa memperlengkapkan diri, bersiap sedia dan berwaspada untuk mempertahankan kedaulatan negara pada bila-bila masa. Kerajaan akan sentiasa meneruskan usaha memodenkan Angkatan Tentera Malaysia agar ianya menjadi sebuah pasukan yang dihormati, berwibawa, cekap dan berkesan sejajar dengan tema sambutan tahun ini 'ATM Tonggak Keselamatan Negara'.

Wassalam.

Datuk Seri Dr Mahathir Mohamad